

PROPOSITIONES DUÆ
LAXIORES DAMNATÆ
AB ALEXANDRO VIII.
D E C R E T U M.

Feria v. Die 24. Augusti 1690.

IN Congregatione Generali Sanctæ Romanæ , & universalis Inquisitionis habitâ in Palatio Apostolico Montis Quirinalis coram Sanctissimo D. N. ALEXANDRO Divinâ Providentiâ Papâ VIII., ac Eminentissimis, & Reverendissimis DD. S. R. E. Cardinalibus in totâ Republicâ Christianâ adversus hæreticam pravitatem Generalibus Inquisitoribus à Sanctâ Sede Apostolicâ specialiter deputatis.

*Proposi-
tiones
duæ la-
xiores
Damn.*

SANCTISSIMUS D. N. ALEXANDER Papâ VIII. non sinè magno animi sui mœrore audivit duas Theses, seu Propositiones, unam denuò, & in majorem Fidelium perniciem suscitati, alteram de novo erumpere; & cum sui Pastoralis Officii munus sit, Oves sibi creditas à noxiis pascuis avertere, & ad salutaria semper dirigere, dictarum Thesium, sive Propositionum examen pluribus in Sacrà Theologîâ Magistris, & deindè Eminentissimis, & Reverendissimis DD. Cardinalibus contrâ hæreticam pravitatem Generalibus Inquisitoribus sedulò commisit, qui pluries, & maturè discussis infrascriptis Thesis, seu Propositionibus, super unaquaque ipsarum sua suffragia Sanctitati suæ sigillatim exposuerunt.

I. Bonitas objectiva consistit in convenientiâ objecti cum naturâ rationali: Formalis verò in conformitate actûs cùm regula morum. Ad hoc sufficit, ut actus moralis tendat in finem ultimum interpretativè, HUNC HOMO NON TENETUR AMARE NEQUE IN PRINCIPIO, NEQUE IN DECURSU VITÆ SUÆ MORALIS.

2. Pec-

2. Peccatum Philosophicum, seu morale est actus humanus disconveniens naturæ rationali, & rectè rationi. Theologicum verò, & mortale est transgressio libera Divinæ legis. Philosophicum quantumvis grave in illo, qui Deum vel ignorat, vel de Deo actu non cogitat, est grave peccatum, sed non est offensa Dei, neque peccatum mortale dissolvens amicitiam Dei, neque æternâ pœnâ dignum.

Quibus peractis, Sanctissimus omnibus plenè, & maturè consideratis, primam Thesim, seu Propositionem declaravit hæreticam, & uti talem damnandam, & prohibendam esse, sicuti damnat, & prohibet sub Censuris, & pœnis contra Hæreticos, & eorum fautores in Jure expressis. Secundam Thesim, seu Propositionem declaravit scandalosam, temerariam, piarum aurium offensivam, & erroneam, & uti talem damnandam, & prohibendam esse, sicut damnat & prohibet, ita ut quicumque illam docuerit, defenderit, ediderit, aut de eâ disputaverit publicè, seu privatim tractaverit, nisi forsan impugnando, ipsò factò incidat in Excommunicationem, à quâ non possit (præterquam in articulo mortis) ab alio quâcumque etiam dignitate fulgente, nisi à pro tempore existente Romano Pontifice absolvi. Insuper districtè in virtute sanctè obedientiæ, & sub interminatione Divini judicii prohibet omnibus Christi Fidelibus cujuscumque conditionis, dignitatis, ac statûs, etiam speciali, & specialissimâ notâ dignis, nè prædictam Thesim, seu Propositionem ad praxim deducant.

Loco ✠ sigilli.

Alexander Speronus S. Romanæ, & Universalis Inquisitionis Notarius.

Die 24. Augusti 1690. supradictum Decretum affixum, & publicatum fuit ad valvas Basilica Principis Apostolorum, Palatii S. Officii, in acie Cam-

pi Flora, ac aliis locis solitis, & consuetis Urbis
per me Franciscum Perinum SS. D. Nostri Papa, &
Sanctissima Inquisitionis Cursorem.

PROPOSITIO DAMN. DE AMORE DEI.

Bonitas objectiva consistit in convenientiâ objecti
cum naturâ rationali : formalis verò in confor-
mitate actûs cum regulâ morum. Ad hoc sufficit, ut
actus moralis tendat in finem ultimum interpreta-
tivè. Hunc homo non tenetur amare neque in prin-
cipio, neque in decursu vitæ suæ moralis.

D. THOMAS 1. 2. q. 89. art 6. ad 3. Cum homo
usum rationis habere inceperit ; .. HOC EST TEM-
PUS, pro quo obligatur ex Dei præcepto affirmati-
vo, quò Dominus dicit convertimini ad me, ut
ad finem ultimum appetitionis vestræ, & ego con-
vertar ad vos, Zacharia primo.

Et certè rationi maximè consentaneum est, ut
Deus pro beneficio Creationis, in quâ summus er-
gà genus humanum ad imaginem suam conditum
amor relucet, rationi, inquam, consentaneum,
& justissimum est, ut Deus ab homine in diluculo
rationis pensionem sui dilectionis exigat, & pri-
mitias Libertatis à se creatæ, quæque est in bo-
num, & malum versatilis, per actionem bonam
sibi consecrari postulet, sicut olim in lege Moy-
saicâ præcipiebat sibi offerri omnia primogenita
animalium, & frugum terræ.

Nec vitæ moralis decursus ab obligatione Divi-
ni Amoris actus eliciendi exemptus est, ut supra
demonstravimus ad propositiones damnatas de cha-
ritate ergà Deum.

De peccato Philosophico.

Famosum PROPOSITIO DAMN.

peccatum **P**eccatum Philosophicum, seu morale, est actus
Philoso- humanus disconveniens naturæ rationali, &
phicum. rectæ rationi : Theologicum verò, & mortale est
transf.

transgressio libera Divinae legis. Philosophicum quantumvis grave in illo, qui Deum vel ignorat, vel de Deo actu non cogitat, est grave peccatum, sed non est offensiva Dei, neque peccatum mortale dissolvens amicitiam Dei, neque aeternam poenam dignum.

D. THOMAS I. 2. q. 71. art. 2. ad 4. *Quidquid est contra rationem artificiatam, est etiam contra naturam artis, quam artificiatum producitur. Lex autem aeterna comparatur ad ordinem rationis humanae, sicut ars ad artificiatum: unde ejusdem rationis est, quod peccatum sit contra Ordinem rationis humanae, & QUOD SIT CONTRA LEGEM AETERNAM: adedque dari nequit peccatum, quod rationi adversetur, id est, Philosophicum, quin hoc ipso legi aeternae refragetur, & consequenter quin sit Theologicum.*

Porro hanc in Propositione duo expendenda sunt. Primum supponit illa, dari posse ignorantiam Dei *invincibilem*, proindeque a peccato excusantem. Secundum requirit ad *Theologicè* peccandum *actualement* de Deo cogitationem. Primum liquet ex verbis istis, *Philosophicum, quantumvis grave in illo, qui Deum ignorat*: alterum in sequentibus. *Vel de Deo actu non cogitat.*

Dari non posse ignorantiam invincibilem Dei, asserit haec stupenda moles universi certatim praedicans Dei notitiam hominis esse insitam, ingentem, implantatam, infematam. *Hac est vis vera Divinitatis*, inquit Doctorum Aquila tract. 106. in Joan. *Ut creatura rationali jam ratione utenti non omnino, ac penitus possit abscondi.* Adedque nequit dari ignorantia Dei invincibilis, & consequenter inculpabilis. Hinc dicitur Psalmo 78.: *Effunde iram tuam in Gentes, quae te non noverunt; & tamen cognoscere potuerunt.* Ruit igitur peccatum *Philosophicum*, quod in praefata potissimum ignorantia fundabatur.

Ceterum fuerunt nonnulli, qui ipsum Doctorem Angelicum, hujus erroris (ut vidimus) Prae-
debellatorem in illius patronum vocare non sunt
veriti

Object. veriti ob illa, quæ habet 22. q. 20. art. 3. in corpore. *Si posset esse conversio ad bonum commutabile sine aversione à Deo: quamvis esset inordinata, non esset peccatum mortale.* Sed quis hic

Resp. non videat, Divum Thomam (ut alia ad textum loci opportuna præteream) loqui hypotheticè? in hypothese scilicet, quòd detur ignorantia Dei invincibilis? In tali enim suppositione peccatum non esset *Theologicum* (cum ignorantia invincibilis à peccato excuset) sed merè *Philosophicum*.

Object. Benè est, inquebant peccati Philosophici defensores: *Theologi nostri defendunt hanc Propositionem dumtaxat de peccato Philosophico, si, vel quando existentia Dei invincibiliter ignoraretur, adeoque in hypothese jam allegatâ; proindè nos Alexandrina non involvit condemnatio.*

Resp. Sed quantus hic error, & cæcitas! Certè Alexander VIII. non feriit Propositionem *conditionatam*, sed *absolutam*? non feriit phantasma, sed rem ipsam. Sic & vulmen Apostolicum non fuit vibratum in phantasma Jansenii (ut filii iniquitatis volebant) sed in hæresim Jansenianam reverà talem. En verba Alexandri VIII. *Peccatum Philosophicum quantumvis grave in illo qui Deum vel ignorat (ecce ignorantia absoluta, non conditionata) vel de eo actu non cogitat? est grave peccatum, sed non est offensa Dei &c.*

Supereft consideranda *actualis* de Deo cogitatio, quam famosi istius peccati *Philosophici* assertores ad *Theologicè* peccandum requiri sustinebant.

Sanè illam non requiri, sed verè, formaliter, & *Theologicè* peccare eum, qui de Deo actu non cogitat, luce meridianâ clariùs ex sacris patet Oraculis. *Exacerbavit Dominum peccator.* Psalm. 9. Sed cur exacerbavit? Fuitne semper in illo *actualis* de Deo cogitatio? Semperne fuit Deus in conspectu ejus alioquin non peccaturi? Minimè verò: Imò hoc ipsum ei jure merito exprobat, & peccato vertitur, quòd de Deo non cogitarit, seu Deum oculis suis non præfixerit. *Non est Deus in inspectu ejus.* Eòdem Psalmò v. 26. Deindè

Deindè : si ad *Theologicè* peccandum semper *actualis* de Deo, aut de peccati, quod Deum infinite offendit, malitiâ cogitatio requireretur, nonnè innumeri Athei, Machiavello-politici, & consuetudinarii in criminum voraginem sinè ullâ Dei, vel malitiæ consideratione se præcipitantes à peccatis eximerentur?

Solida docet Theologia ad peccatum requiri, & sufficere, quòd quis potuerit, & debuerit de Deo cogitare, vel reflectere ad Deum, aut ad gravitatem peccati infinitam involventis malitiam; quòdque ad illa omnia non reflexerit.

Sed ecce errorem quasi suis exortum temporibus, formalissimè damnatum ab Angelico I. 2. q. 74. art. 7. ad 2. *Ratio superior*, inquit, seu mens dicitur consentire in peccatum, SIVE COGITET DE LEGE ÆTERNA (quæ Deus est) SIVE NON.

Lustratâ laxitate, perpendamus modò extremum aliud, Propositiones scilicet Rigorosiore. *Nimius Rigor. extremum*
Illæ sunt 31. ab eodem *Alexandro VIII.* damnatæ.

PROPOSITIONES 31. DAMNATÆ *Laxitati oppositum*

AB ALEXANDRO VIII.

D E C R E T U M.

Feria V. Die 7. Decembris 1690.

IN Congregatione Generali Sanctæ Romanæ, & Universalis Inquisitionis habitâ in Palatio Apostolico Montis Quirinalis, coram Sanctissimo D. N. D. Alexandro Divinâ Providentiâ Papâ VIII., ac Eminentissimis, & RR. DD. S. R. E. Cardinalibus in totâ Republicâ Christianâ contra Hæreticam pravitatem Generalibus Inquisitoribus, à Sanctâ Sede Apostolicâ specialiter deputatis.

Sanctissimus D. N. Alexander Divinâ Providentiâ Papa VIII. prædictus pro Pastoralis curâ *Propositiones 31. rigorosiores.*
Ovium à Christo Domino sibi commissâ de earum salute *res.*